


太子太傅光祿勳東嶽府君年譜

傳 684.533  
877  
1-2



書號	
登記號	五八〇五四
函冊	一
	二

同治己未  
歲次庚申  
正月  
朔於廣州

御賜祭文

朕惟總制領兼圻之任籌邊端賴良臣  
保釐繫分陝之司作鎮猶資碩輔方睠  
風徽於前席何期星隕於中臺宜茂飾  
終用光設醊爾晉加太子太傅銜原任  
陝甘總督裕泰持躬正直效職恭勤初



草制於宸垣遂紬書於史局迴翔內院  
屢著勤能卓薦通階曾邀記注遂荷  
先皇之特簡晉遷益部之監司陳臬而五聽  
求情開藩而六條察吏洎乎陪京兼尹  
水部襄猷總戎昭專閩之威教胄廣掄  
才之典司冠掌邦禁再佐秋官開府作

中丞于蕃黔地爰建牙於衡岳旋移節  
於章江制軍仗文武之材寵命重湖湘  
之寄屬以匪徒肆擾用資師旅徂征始  
而下雋鳩張翦萑苻之保聚繼則扶彝  
蠢動除苞蘖之滋萌迅奏膚公秩晉頭  
銜一品載膺懋賞榮頒翎翠雙圓特加

保傳之崇階用表旂常之偉績肆予纘  
極圖任舊人俾節制於甌閩樓船永靜  
兼部行於浙水桴鼓不驚嘉茲方鎮之  
賢勞昇以咸秦之旌鉞方抒誠於述職  
勉力前驅俄遘疾於積勞俯俞靜攝遺  
章遽覽軫念良深加異數以酬庸賞延

後嗣命禮官而賜奠眷篤蓋臣爰稽典  
以易名特褒賢而予祀金壘載錫玉簡  
增華於戲鼎彝旌心膂之勲  
三朝宣力圭瓚留股肱之烈百世銘功靈而  
有知承茲渥寵

御賜碑文

朕惟封圻任重宣勞允賴乎蓋臣綸綍  
恩隆報績斯加以茂典矧其受  
三朝之知遇中外敷猷尤宜沛九陛之榮施  
始終賁寵章茲崇碣光被幽泉爾晉加  
太子太傅銜原任陝甘總督裕泰秉性

端方持躬謹慎早蜚聲於槐序遂供職  
於薇垣升除領鵷掖之班旋邀首叙觀  
察分麟符之寄屢轉頭銜擢柏臺而廉  
訪名彰綰藩條而旬宣績茂皖江蜀棧  
宦轍俄更楚嶠秦關輿歌未歇卿貳游  
司夫起部間任輜軒保釐兼尹乎陪都

並操衡鑒入持丹筆出撫黔方易地皆  
良四省既頻移節鉞需材孔亟兩湖更  
久駐旄旂歷著勤能用膺總制屬狼烽  
之警急士仗干城統虎旅以蕩平民欣  
安堵捷奏而宮銜再錫庸酬而冠羽雙  
影朕誕受丕基即頒寵命初移海澨復

調巖疆良以邊徼之區必藉重臣之鎮  
乃雙旌甫至方期造膝以陳謨而二豎  
交侵竟至鞠躬而盡瘁淪殂遽告悼惜  
良深錫溫詔以重申典昭賜卹普洪恩  
於諸子誼在推仁綜厥生平謚為莊毅  
於戲服官卅載甘棠貽雁戶之思勒石


千秋宰樹壯螭碑之色庶傳來葉視此  
貞珉

國史館本傳

裕泰他他拉氏滿洲鑲紅旗人由官學生於嘉慶十三年考授內閣中書二十一年升侍讀二十四年

京察一等

記名以道府用閏四月授四川成龍縣茂道道  
光三年正月擢湖南按察使二月調四  
川按察使五年調安徽按察使六年遷





升湖南布政使九年護理湖南巡撫十一年二月調陝西布政使六月調安徽布政使六月升

盛京刑部侍郎十一月

命管理移居宗室事務十二年正月調

盛京工部侍郎兼管奉天府府尹事務五

月遵

旨赴科爾沁查勘旗界閒荒地畝開墾事宜酌

擬章程八條具奏下理藩院議行閏九月以前護理湖南巡撫任內失察逆猺趙金隴滋事降二級留任十二月以藉案劾奏

盛京將軍奕顥經

欽差大學士富俊等查按不實又奏參協領並不向署將軍商辦殊失和衷之道部議降二級留任十三年三月遵

旨查奏奉天各屬積存糧石請聽商船照常到  
口販運接濟鄰省民食勿任姦商抑勒  
報

聞旋調刑部右侍郎十一月授貴州巡撫十六  
年正月奏古州黎平一帶毗連楚粵向  
多匪徒出沒節經派員拏獲會匪徐玉  
潰等首從各犯多名治罪如律得

旨嘉獎尋調湖南巡撫時新甯縣逆匪藍正樽

聚眾滋事圍撲武岡州城奏請馳赴寶  
慶接印勦辦旋抵沅州奏言逆匪甫經  
起事即被官兵勦敗逃散不難立就肅  
清所調鎮筵鎮兵勇未經起程者已飭  
暫行停留疏入

諭曰此等烏合匪徒不值重煩兵力裕泰著即  
在湖南省城接印任事督同藩司調撥糧餉  
妥籌辦理毋庸前往勦辦三月以鎮筵鎮兵

勇滋事總兵向遵化辰沅道常慶平日  
駕馭無方致兵勇聚眾挾制事後復捏  
飾稟報借湖廣總督訥爾經額劾奏請  
革職嚴審得

旨所參是向遵化常慶俱奪職訊辦如律先是  
貴州黎平府張鳳翮於地方公事毫無  
振作裕泰僅於年終摺內密請休致調  
任後並不補行參劾至是奉

旨詢問始據實覆奏

上責其顛預下部議處十一月奏參永順府知  
府王鳴球於學政按試時為屬員永順  
縣知縣馮茂勳面遞名條懇求取錄文  
童典史張運升牟培源亦以當差甚苦  
求各進武童一名請革職嚴訊尋鞫實  
分別褫職遣戍十二月籌議鎮筸鎮善  
後事宜偕訥爾經額總兵楊芳列款陳

奏一緩扣道標練勇借款一兵勇不准  
以客民充補一豫借銀穀限以定制一  
辰沅道缺以本省知府升補一拔補備  
弁屯長嚴絕芑苴均如所請行十七年  
正月調江西巡撫二月議覆御史劉夢  
蘭奏查禁糧船丁弁容庇匪徒一摺請  
嗣後糧船未開以前責成該道督同廳  
弁嚴密按查既開以後飭令沿途州縣

派役巡緝仍令該道督同運員幫弁隨  
時巡察如有匪徒溷蹟即密飭所在州  
縣汛弁嚴拏究治不准弁丁庇護兵丁  
縱放以肅漕政而儆兇頑六月訪獲大  
夥販私鹽犯沈添輝等十八年正月飭  
各屬查拏會匪李長等一百二十餘名  
南安府續獲盧添芹等多名均究辦如  
律得

旨嘉獎五月鴻臚寺卿黃爵滋奏請飭禁鴉片  
煙入口紋銀出洋

上命直省督撫各抒所見裕泰議上四條一接  
引外夷之姦徒應嚴定專條治罪一沿  
海水師各營汛弁兵有包庇賄縱者從  
實究辦一申嚴海洋船隻出入禁例一  
嚴定地方文武各官失察處分下軍機  
大臣等會議施行九月調湖南巡撫十

二月以在江西任內劾南昌府知府張  
寅各款查無實據經左都御史姚元之  
參奏

命交新任巡撫錢寶琛查辦尋覆奏並請將裕  
泰交部察議

諭曰督撫大吏於所屬各員原當隨時查察如  
有應劾之員立即專摺參奏方為無忝厥職  
裕泰於所屬知府張寅訪有物議奏請查辦

本為整飭官方起見迨經詳查各款或事出有因或訊無實據並不敢因參奏在先稍存迴護是其前後均無不合著毋庸交部察議十九年四月奏先後訪獲大小煙犯並吸食及畏罪自首之興販各犯究辦如律得

旨所辦甚好八月議覆御史焦友麟請令教官稽查生員宣講一摺請循照舊章舉充

約正編造保甲得

旨奉行以實十一月以查出武場賄囑換遞輕弓舞弊之武生並聽受賄囑及事後捏稟之營弁奏請分別嚴審究辦

允之並

嘉其所查細心十二月以湖南漕船進口遲延籌議豫期督催章程具奏得

旨依議妥實為之二十年正月奏請借項修築

華容沅江等縣水衝各隄垸

允之十一月授湖廣總督十二月奏湖北長樂縣匪徒胡啓全等糾眾滋事派員查緝防堵尋兼署湖北巡撫二十一年三月以荊州倉米因上年各屬被水蠲緩不敷支放兵餉奏請動項買補又奏籌款借給浙江省委員購買鑄礮鐵斤運浙以濟軍需俱

允之九月以御史盧毓嵩奏請嚴禁私硝裕泰

旨籌議民間掃積硝斤由地方官給價收買及查禁私販偷漏各章程奏

聞得

旨認真嚴辦十一月奏請將荊州之周正關酌移於柳家集以便科稅而免偷漏下部議行又以潛江縣民隄潰口奏請以工

代賑又奏動款賑卹嘉魚漢川等九州  
縣水災並修築鍾祥縣十五工羅家腦  
及江陵公安二縣被水漫缺各隄均如  
所請行是月崇陽縣逆匪鍾人杰聚眾  
倡亂攻踞縣城並襲陷通城分撲通山  
蒲圻縣境肆行劫掠裕泰先飭按察使  
郭熊飛都司玉貴帶兵馳往兜勦尋即  
親赴咸甯扼要防堵崇陽在萬山之中

崇山窄徑逆匪等將各路扼斷堆砌石  
牆暗設坑陷裕泰密派將領選帶精兵  
腹背夾擊時賊匪二千餘人由山嶺分  
路潛進攻撲蒲圻之丁泗橋經官兵奮  
勇截殺賊敗竄二十二年正月賊乘小  
船順流擁至蒲圻占據城外山坡壘經  
官兵轟擊先後殲賊數百人賊猶恃眾  
抗拒適先期派往策應之副將雙福帶



兵馳至合力兜剿擒斬多名城內兵勇  
開門夾擊大敗之其分撲通山之賊亦  
經我兵奮力衝擊奪據要害賊大潰狂  
奔追斬無算奏入得

旨嘉獎

賞戴花翎賊眾竄踞崇陽之西嶺小嶺等處裕  
泰令湖北提督劉允孝等分道進攻奪  
踞各賊卡會同進圍崇陽

上嘉其調度有方先行下部議敘嗣又由石盤  
山進剿疊敗之黑橋等處五路並進逼  
近賊巢擒首逆鍾人杰並賊目陳寶銘  
汪敦族等遂復崇陽縣城奏入

賞加太子太保銜並換雙眼花翎續獲占踞通  
城之逆黨但扶隴等通城亦復二月以  
逆匪全數就擒並將家屬拏獲又

諭曰裕泰辦理軍務迅速葳功且於收復兩城

後將首要各犯並逆匪家屬全行生獲不留  
餘孽甚屬可嘉著再加恩交部議敘三月審  
明逆犯解京並自請議處得

旨崇陽逆匪滋事該督平日失於覺察本有應  
得之咎姑念勦辦尚為迅速著加恩免其議  
處尋議崇陽善後事宜六條一改移正佐員  
缺一移設弁兵一清查逆產一禁包攬  
錢漕勒索積弊一添設保甲操練民壯

一設立義學俱下部議行六月荆江水  
漲上漁埠頭漫口城鄉被淹馳赴荊州  
安撫十月勘明江陵等州縣水災分別  
撫賑蠲緩又修復江陵等縣漫潰民隄  
以工代賑仍撫卹無告貧民十一月奏  
湖南徭疆搶劫匪犯朱亮二等一案人  
數眾多其中罪應斬決斬梟者即有十  
餘名屢經委審供詞互異出入甚重擬

請

敕交

欽差尚書麟魁侍郎王植於查辦邵陽縣控案  
時就近會同詳細檢訊俾成信讞得

旨准行先是

上以暎夷犯順由海入江水師戰船亟應整備  
命裕泰於武昌停泊之江廣鹽船並救生各船  
內選雇堅緻者數百隻挑募熟習水性

之人認真習練水戰至是十二月裕泰  
復擬造防江戰船名曰開浪船繪圖呈  
進

上以法未盡善勢難得力頒給廣東所進船式  
圖說二分

諭令酌量變通飭造二十三年奏施南府知府  
顧椿所擬鼇脊船與粵東在籍員外郎  
許祥光所擬船式大略相同擬即就三

船圖式酌量辦理

諭曰不必拘定三船圖式總須駕駛靈便順逆  
風水皆能縱橫自如方為合用該督於戰船  
造成水手駕駛純熟即帶同文武將備親往  
乘船浮江試驗勿僅據委員工匠之言遂信  
為得力也旋奏督飭變通妥辦較原式略為  
長大計成鼇脊大船六隻快哨船四隻  
試行江面頗稱靈便遂將六船分作兩

隊前為令船後為中軍兩旁各分二船  
為左右翼每船先於漢陽水師營挑撥  
常操兵一百名並選千把總一員管帶  
每月按旬輪操每年春秋二季各大閱  
一次下部議行二十四年七月以督署  
不戒於火下部議處十月復兼署湖北  
巡撫十一月奏將漢陽水師營並原防  
新隄汛之唬戰巡船分別裁減以節經

費二十六年奏荊州駐防旗人生齒日繁往往潛至漢城滋事請嗣後有無故生事者即由該地方官拘拏申報將軍秉公究辦俱

從之二十八年正月奏湖南乾州等廳屬苗匪糾眾竄擾疊次追勦獲勝並設法招撫解散

諭曰該督仍當督飭鎮道派兵分路按捕不得

稍留餘孽以期永靖苗疆九月奏湖北省本年災區寬廣竟有三十餘州縣之多亟籌賑撫有隄各屬以工代賑

諭曰該督惟當督飭各員於撫卹加賑務各認真俾小民均沾實惠遇災而懼勉之慎之二十九年三月復以督署失火下部議處旋以湖南鳳凰等廳縣屯田被水冲壓奏請將額租分別豁減

允之十月湖南新甯縣逆匪李沅發聚眾滋事據城戕官裕泰親往堵剿擒斬多名逆匪分竄黔粵境內裹脅滋擾飭令將弁分途追剿並駐紮扼要之長安堡等處防其回竄三十年三月由各山內殲擒賊目匪黨無算餘匪竄至永福之草鞋塘兵勇抄襲圍剿勢甚窮蹙裕泰度賊非直趨粵屬之西延全州即折回新甯

猺崗以圖避匿密飭將領分途追擊虛留一路引其竄回一面於武岡等處添募壯勇布置密防適提督向榮行抵武岡即令馳赴楚粵邊界督捕追至懷遠縣屬之思隴賊眾正分三路紮排渡河各將弁督兵奮力攻擊殲戮甚多餘賊復竄粵楚交界之壘岩坪楊梅崗一帶我兵各路兜剿賊退走金峯嶺山內屢

撲羅家田燕子岩等卡欲從小路竄逸  
經兵勇擊退仍踞半山廟中拒守練勇  
搶上山梁焚燬廟宇賊復竄匿山頂廟  
中金峯嶺山勢險峻縣互百餘里且山  
路三面皆通粵西隨處可以潛越因偕  
向榮督率各路官兵三路進攻由深茅  
陡石間踴躍登山合力痛勦斬獲殆盡  
首逆李沅發就擒地方一律肅清奏入

諭曰李沅發自上年糾黨據城若使立時撲  
滅何至竄擾三省蔓延愈甚裕泰辦理軍  
務雖不免遲延然首逆就擒俾漏網元兇  
不致倖逃顯戮其功自不可掩著加恩晉  
加太子太傅銜十一月調閩浙總督咸豐  
元年三月兼署福建巡撫五月調陝甘  
總督以變通福建省保甲章程酌擬六  
條陳奏

諭接任督撫照議妥辦十月以保舉已革湖  
南辰永沅靖道呂恩湛不實下部議處  
旋以

陛見到京因病請假尋卒

諭曰陝甘總督裕泰自嘉慶年間由內閣侍  
讀外擢監司洊膺卿貳歷任封圻宣力有  
年勲勞素著前在湖廣總督任內勦平崇  
陽逆匪蒙

皇考宣宗成皇帝賞戴雙眼花翎並加太子  
保銜上年勦辦湖南逆匪歲事晉加太子  
太傅銜朕以陝甘總督係邊疆要缺整頓  
需人特由閩浙調任方資倚畀乃甫經抵  
都因病予假數日之間遽聞溘逝悼惜殊  
深著加恩照尚書例賜卹任內一切處分  
悉與開復應得卹典該衙門察例具奏伊  
子候補六品京官長啓著以員外郎用員



外郎長善候補主事長敬監生長敘均著  
俟百日孝滿後由吏部帶領引見候朕施  
恩以示優卹蓋臣至意尋

賜祭葬

予諡莊毅

遺摺

奏為沈痼難瘳瀝陳感戀事竊努滿洲世僕才識庸愚  
自嘉慶初年由官學生考取內閣中書游升侍讀二  
十四年蒙

仁宗睿皇帝簡放四川松茂道道光三年蒙

宣宗成皇帝升授湖南按察使旋調四川安徽即升湖南布  
政使歷調陝西安徽內擢

盛京刑部工部侍郎入貳刑部遂蒙

恩特任封圻由貴州湖南江西巡撫升任湖廣總督以勤平

崇陽逆匪微勞迭蒙

賞戴雙眼花翎並

賞加太子太保銜

皇上御極之初復以勦平李沅發歲事蒙

恩賞加太子太傅銜上年奉

命調任閩浙本年五月

特旨調任陝甘自揣一介菲材得荷

三朝寵渥涓埃未報兢惕常深竚久任楚疆卑溼之區舊因履勘江隄查灾放賑積染潮溼浸淫於肺胃之間漸

成痰飲每年必發發亦尋愈及至閩省公事多不順手焦心措置虧乏更深加以彼地溼熱交蒸病肺雖劇尚能力疾辦公迨聞

命北上迅速遄行感受風寒喘嗽不止日形委頓於本月十一日扶病入城亟思瞻謁

天顏而病不能支不得已陳請暫假仰蒙

鴻慈逾格給假調理

諭以甘省正須整頓上繫

聖懷敢不加以意醫調以抒

君父之望無如火炎水竭內伏沈寒表散難施導滌無效  
竟成不起之症伏念孛受

三朝眷養深仁雖頂踵捐糜不足言報當此野番亟須捕治  
但期畧能勉力措拄即可面聆

訓誨前往西疆乃竟不自料遘疾未幾遽致殄殢無緣一  
瞻夫

九陛長賚遺憾於重泉負

高天厚地之殊施誠結草銜環而罔極孛服官三十餘載  
平日謹懍自持在湖北搏節岸費存庫十餘萬金未

嘗妄取惟賑項除自捐以外有所提用與撫臣皆未  
歸還修署不敷借款尚須籌解實私忱所未了雖危  
篤而難忘至於保薦失實愆咎難辭雖蒙

覆載之包容實抱慚惶於畢世孛惟有勉囑孛之長子文  
舉人由郎中降調候補六品京官長啓次子調京員  
外郎長善三子候補主事長敬四子監生長敘長孫  
廕生志潤次孫官學生志燮三孫志覲慎守清白砥  
礪駑駘皆為

國家出力以補未竟之願冀圖報

深恩於世世實莫名感戴於生生矣伏枕哀鳴血淚俱下  
無窮感戀不知所云為此口授遺摺瀝陳下情仰祈

恩鑒謹

奏

皇清誥授光祿大夫太子太傅兵部尚書都察院右都  
御史陝甘總督管巡撫事 予諡莊毅顯考東巖府  
君年譜

皇清誥授光祿大夫 太子太傅兵部尚書都察院右都

御史陝甘總督管巡撫事 予諡莊毅顯考東巖府  
君年譜



乾隆五十三年戊申十一月十三日丑時府君生

府君姓他塔喇氏 諱裕泰 字東巖 號餘山先世居長

白山札庫穆地方始祖公 諱額爾古達

國初歸附隸鑲紅旗滿洲第十三佐領凡五傳至府君

曾祖考 諱五達色官驍騎校道光二十二年以府君

官

誥贈光祿大夫湖廣總督曾祖妣伊爾根覺羅氏

誥贈一品夫人祖考諱全保

誥贈光祿大夫湖廣總督祖妣李佳氏

誥贈一品夫人考諱薩郎阿乾隆壬子科繙譯舉人歷官吏

部文選司主事

誥贈光祿大夫湖廣總督妣李氏

誥贈一品夫人吏部公生三子府君最少長爲先伯父諱成

泰官翰林院筆帖式次爲伯父健夫公諱新泰歷官

中書科戶部緞疋庫理藩院筆帖式工部司務

泰陵承辦事務衙門主事

五十四年己酉府君二歲

五十五年庚戌府君三歲

五十六年辛亥府君四歲

府君天資穎異聰慧過人吏部公特鍾愛之嘗曰此子骨相不凡必成大器其昌大吾門乎嘗與客坐談府君侍側客戲問天爲何物府君應曰天乃氣也客大竒之

五十七年壬子府君五歲

吏部公口授清語

五十八年癸丑府君六歲

入小學吏部公躬自課讀五經四子皆親授

五十九年甲寅府君七歲

六十年乙卯府君八歲

嘉慶元年丙辰府君九歲

二年丁巳府君十歲

三年戊午府君十一歲

挑補國子監官學生分第四館肄業

四年己未府君十二歲

五年庚申府君十三歲

六年辛酉府君十四歲

考取 內閣繙譯中書

七年壬戌府君十五歲

咨取到 閣學習行走

八年癸亥府君十六歲

九年甲子府君十七歲

十年乙丑府君十八歲

十一年丙寅府君十九歲

是年春以改本中書隨扈

東陵

十二年丁卯府君二十歲

十三年戊辰府君二十一歲

是年補授中書實缺

十四年己巳府君二十二歲

十五年庚午府君二十三歲

十六年辛未府君二十四歲

充考試繙譯生員同考官正考官爲大學士明公亮  
副考官爲侍郎成公格分校共四員府君所薦取中  
較多

先妣瓜爾佳太夫人來歸正黃旗滿洲頭甲喇崇林

佐領下二等侍衛諱西齡阿公女

十七年壬申府君二十五歲

六月先大父吏部公棄養府君持服百日循例當差  
十八年癸酉府君二十六歲

九月李太夫人棄養府君迭遭大故哀毀逾恆時逆  
匪林清作亂匪黨潛入

大內京師戒嚴人情洶洶事平後猶各懷疑懼慶弔不  
通有勸暫緩葬期者府君曰親喪不葬何以爲人設  
有他故予一身任之遂擇吉合葬於沙溝新塋  
十九年甲戌府君二十七歲

充考試繙譯生員同考官主考爲尙書福公慶副憲  
誠公安得士之盛與辛未同

二十年乙亥府君二十八歲

二十一年丙子府君二十九歲

京察一等是年升授 內閣侍讀

二十二年丁丑府君三十歲

扈

蹕木蘭辦理發報事件

十一月不孝 長啟生

二十三年戊寅府君三十一歲

充 國史館提調官

二十四年己卯府君三十二歲

京察一等奉

旨記名四月

簡放四川松茂兵備道六月出都赴任襄平相國蔣公重府

君才為請廣轄境改分巡成龍縣茂等處駐省倚以

治水利襄庶政極相契洽在任五年

二十五年庚辰府君三十三歲

道光元年辛巳府君三十四歲

二年壬午府君三十五歲

三年癸未府君三十六歲

正月升任湖南按察使二月調補四川按察使入都



陞見九月回任具摺謝

恩奉

硃批諸務謹慎而行盡心力以奉職守不可稍存滿假慎之  
欽此時巴縣有殺死一家九命仇盜未分之案縣令  
帶犯晉省委員提訊以無兇器見證供詞全翻原問  
官亦不能指實府君查核原案似無枉乃親提至署  
乘夜隔別黨與反復研鞫得其隱情始一一吐實案  
乃結

四年甲申府君三十七歲

五年乙酉府君三十八歲

二月調補安徽按察使入都

陞見八月到任具摺謝

恩奉

硃批知道了滿招損謙受益汝其戒之欽此府君因以謙受  
益名齋

六年丙戌府君三十九歲

三月兼署安徽布政使事旋升湖南布政使六月到  
任具摺謝

恩奉

硃批知之非艱行之維艱懍之慎之勿視爲空言也欽此時

醴陵蛟水驟發官署民居概行衝沒文報未至省府君見江上有人畜木植隨波漂下併風聞該縣及茶陵等州縣均有被水之事呈明大府親往查勘調撥倉穀分投賑濟災黎賴以獲全

七年丁亥府君四十歲

八年戊子府君四十一歲

八月充湖南鄉試提調官

十二月護理湖南巡撫

九年己丑府君四十二歲

四月卸署巡撫事是月不孝長善生側室游太夫人

出

十年庚寅府君四十三歲

七月護理湖南巡撫奏查明岳常澧三府州隄垸被水不致成災情形

八月卸署巡撫事

十二月復護理湖南巡撫

十一年辛卯府君四十四歲

正月卸署巡撫事

二月調補陝西布政使入都

陛見士庶聚集湘江攀輿依戀繪湘江送別圖以贈

四月長女生側室廖孺人出

六月調補安徽布政使七月抵任時久雨江湖併漲  
大江南北多被淹府君途次聞信卽兼程馳赴廬鳳  
一帶周歷查勘隨處安撫論以在籍候賑不得輕去  
其鄉併以隨帶行資先行酌量散給江北等郡得免  
流亡蒞任後督同安慶太守劉公韻珂悉心籌辦逐  
日分起散給錢文自秋徂冬全活甚多

十月升任 盛京刑部侍郎十一月入都

陛見因途次感受風寒不能入

覲經軍機大臣代奏奉

旨賞假遣軍機章京松公林至寓看視併

諭回家調理病痊疊蒙

召對十二月抵任奉

上諭兼管移居宗室事務

十一月不孝長敬生側室游太夫人出

十二年壬辰府君四十五歲

正月調任 盛京工部侍郎兼管奉天府府尹事務

二月署理 盛京將軍印務

五月奉

旨往邊外查辦開荒事宜 先是科爾沁郡王僧格林沁因

其邊地屢被奸民李亭開等招集流民占踞開墾請假回旗清查遂帶領蒙古人等將流民搭蓋窩棚焚燬咨請理藩院具

奏奉

旨派府君前往查辦隨於六月出邊將流民所占地基逐一履勘併查拏滋事奸民提案嚴訊究出蒙古台吉倫當原由府君以該民戶等攜眷出關原因庫都力地方招民開墾是以出錢租種初不知地址所在今所出押荒錢文既爲窮苦台吉誑使無可追償若再按戶驅逐是該民人等錢地兩空難以謀生亦殊可憫

查該處界內尙有閒荒足可安插因奏請將誤寫界外地畝之民人三百餘戶令其移入界內與原招民戶一體種地輸租惟將爲首拒捕之李亭開等數人分別斬梟充發其誑使押荒錢文之蒙古台吉亦照例罰革安置鄰盟如此明定科條嚴加懲創實於蒙古民人兩有裨益奉

旨交理藩院議行

閏九月以前護湖南巡撫失察逆徭滋事被議蒙

恩降二級留任

十二月考試宗室覺羅學漢教習奉

旨派府君偕兵部侍郎德公興充主考官取中王光熊等十名時以彈奏將軍奕顯又奏劾協領不向署將軍商辦部議降二級復蒙

恩留任

十三年癸巳府君四十六歲是春

欽派協同工部尙書白公鎔修理

永陵啟運殿工程三月查奏奉天各屬積存糧石請聽商船到口販運接濟鄰省民食得

旨允行旋奉

旨調補刑部右侍郎七月

永陵工程告竣旋省交卸赴京奉天士庶於懷遠門外設餞留鞞併懸常存去思扁額及舊澤被遼東赤子新猷撫天下蒼生板聯八月到京謝

恩蒞任

十一月奉

旨補授貴州巡撫十二月

陛辭出都

十四年甲午府君四十七歲二月抵黔撫任時春雨愆期糧價騰貴黔中山多地

少民食維艱府君飭屬平糶按市平米價逐日酌減親督辦理市價漸平旋逢透雨秋穫豐登買補還倉有盈無絀府君久歷外任凡有益於民者因事制宜多類此

三月陳奏地方大概情形奉

硃批除莠安良必須實力外省之規避諱飾畏難姑息諸惡習實堪痛恨汝若能力挽頽風方爲不負委任不可始勤終怠也欽此又

硃批一切勉力而行不可一奏了事欽此

六月次女生側室廖孺人出

十五年乙未府君四十八歲

三月不孝長啟娶婦伍彌特氏正黃旗蒙古一等侯

原任盛京副都統黑龍江將軍諱蘇崇阿公女

四月三女生側室游太夫人出

黔省吏治因循案件率多延擱府君到任後嚴飭各屬將自理詞訟已未完結案數備錄事由按月申報併立定章程疊次嚴催一年中計共詳結要案四百八十七件併究出架空唆陷之訟棍多名奏請照例懲辦得

白嘉獎

十月奉到

頒賞御製平定回疆戰圖全冊

十六年丙申府君四十九歲

正月奏訪聞匪徒徐玉潰等設立添弟會名目斂財聚眾傳送逆詞當卽密飭查拏全數擒獲嚴審懲辦是月奉

旨調補湖南巡撫二月交卸赴任途次聞武岡州教匪藍正樽聚眾謀逆業已圍城因奏請開道馳赴寶慶接印勦辦併密陳鎮筵總兵向遵化長沅道常慶撫馭失宜情形奉

上諭裕泰奏武岡州教匪滋事兼程馳往勦辦等語此案前據吳榮光等馳奏當經降旨令訥爾經額馳抵該處會同吳榮光薛陞督飭嚴拏此等烏合匪徒自可就肅清裕泰著仍遵前旨卽在湖南省城接印任事督同藩司調撥糧餉妥籌辦理無庸前往勦辦又據另片奏近聞署辰沅道常慶鎮筵總兵向遵化於調濟鈐束之道未能講求誠恐日久滋生事端等語所奏是著該撫於到任後留心密查如果撫馭失宜養成驕悍卽行據實嚴參毋稍徇隱將此諭令知之欽此是月行抵楚境奏查探武岡州逆匪大概情形併陳將派調後起兵丁暫停起行緣由奉

上諭裕泰奏探聞武岡滋事首逆藍正樽甫經起事卽被官兵斬獲多人餘卽退散併未致傷官兵亦未擾及百姓現既被追逃散不難按名搜捕立就肅清所調官兵足資勦堵其鎮筸兵丁一千名練兵四百名除前起五百名業經起行外未經起行者已飭該道暫行停留等語所見是此等烏合匪徒一經官兵搜捕立卽蕪事不值重煩兵力裕泰著仍遵前旨無庸前往勦辦又另片奏鎮筸鎮總兵向遵化聲名平常先行嚴參等語該鎮兵練聚衆滋鬧前經訥爾經額等奏明已有旨諭令訥爾經額查辦該撫卽會同該督將向遵化如何辦理不善併因何起衅之處確切

體訪分別曲直無論在官在兵一併嚴行參辦毋稍寬縱將此各諭令知之欽此

三月行抵寶慶府城接印任事具摺謝

恩併陳遵

旨起程進省奉

硃批知道了欽此

建劉猛將軍祠 湖南向無此祠時飛蝗爲患府君於文昌宮設位虔禱忽有神鴉無數自長沙至巴陵啄食飛蝗淨盡因於城南建祠以答神貺  
九月奏訪獲傳習邪教程恆忠等二十一名照例分



別治罪奏華容安邑巴陵湘鄉茶陵清泉耒陽各州縣均被偏災請將新舊錢糧銀米分別酌予緩徵得

旨允行

奏查明苗疆大概情形併酌擬清查屯防緣由府君以苗疆承平既久積弊日增因奏湖南苗疆自嘉慶二年戡定以後議於鳳凰乾州永綏瀘溪麻陽保靖古丈坪等廳縣設立均田屯勇以資捍衛經前任辰沅道傅鼐修碉築堡練勇挑丁陸續均出田土共計十五萬二千餘畝分別給丁領種召佃收租以供屯防經費屯苗丁弁且耕且守以本地所生之財爲本

地衛民之用寓兵於農洵屬籌邊良法嗣又先後籌撥銀七萬兩以三萬兩存貯道庫餘銀買備穀四萬餘石同苗倉積貯穀石分貯各廳縣以爲儲備緩急之需其操防訓練撫綏教養各事宜定議章程奏明遵守原欲使苗民永遠樂業相安無事惟是治安既久漸生懈弛兼之歷任道員不得其人遂至積弊日增積怨日甚苗官之盤剝屯長之侵蝕書役之勒索丁佃之典當種種弊端均所不免現在交代銀穀既驟轉而丁勇借款日益加增陳陳相因漫無限制因而羣生覬覦之心至有鼓譟挾借勾結戕官之事雖

前案業經督臣訊明奏辦而以數千騎卒養成桀驁目無官長號令不行此時自知情重法輕仍不免動多疑懼激則變生又全在該鎮道輕重得宜寬猛併濟若一味因循遷就市惠養奸正所謂撫之以恩亦恐恩竭則慢且兵勇之設原所以捍禦苗疆近聞該處兵丁多與苗人聯姻尤易啟串通勾結之漸大干例禁本年鎮筸鎮兵勇挾借滋事各廳苗人已生觀望再加以苗官之刻薄屯長之侵欺竊恐苗疆之患有不可勝言者臣自顧幹材心長力短封疆至重不敢不杜漸防微再四思維惟有先將該道經管屯防

事宜澈底清查舉凡民苗生計兵勇口食併應興應革有關利弊者斟酌損益另行妥議章程使兵弁丁勇曉然於中咸知經費有常不致妄生挾制乃責成該鎮道實力整頓恩威併行庶幾積弊可清經久不弊以期仰副

聖主綏靖苗疆之至意奉

硃批經國遠猷必當隨時整飭汝能見及深屬可嘉妥議奏來欽此

特旨詢問前在黔密劾黎平守張鳳翽何以不於調任時補參下部議處

十月奏澧州大圍黃絲等垸連年被淹請將淹廢及  
涸復各田畝新舊正耗錢糧分別豁免以蘇民困得

旨允行

十一月奏請

陛見奉

硃批地方緊要諸凡勉力認真下屆再行奏請欽此

又奏劾永順守王鳴球爲屬員永順令馮茂勳典史

張運升牟培源等於學政前面遞名條求進文童鞠

實分別罷斥遣戍

會議苗疆善後章程 先是奉

上諭有人奏酌擬苗疆善後章程一摺著訥爾經額裕泰楊

慶琛會同詳悉妥議具奏原摺鈔給閱看等因欽此府君

以苗疆邊備屯防均關緊要一切章程均應隨時整

頓但有應暫緩籌辦者有應明定章程者有應遵守

舊制者有應量爲變通者因將原奏各條體察現在

情形參酌從前例案逐一詳悉會核妥議條上七事

一原奏該處道標練勇最稱精悍加以營兵共城

侍衆逞強遂有不受控制之勢該道所轄三廳俱係

苗疆莫若於附近乾州永綏二廳分勻安置以散其

勢仍歸該道每年前赴巡閱平時輪調應操亦足壯

聲威而便徵調等語臣等查鎮算兵勇原爲鳳凰廳逼近苗寨而設其苗情獷悍又以該廳黑苗爲最甚嘉慶二年大兵凱撤後仍不時四出焚掠經該前升道傅鼐團練鵬勦始得全行戡定是以練勇概駐該廳以資鎮懾今苗疆治安已經三十餘年苗情極爲貼服該練勇等操練之外別無所事控制稍有未善誠難保不別滋事端以之分撥三廳使之勢散易制實屬法良意美惟查該練勇等多係土著各有父母妻孥類皆貧苦別無生計必須攜家同往就養而該練勇等現在月領餉銀應扣借款尙多得項僅敷口

食所需盤費一時實力難設措且當甫經滋事懲辦之後遽行分地移駐更恐啟其疑懼之心再四思維應請暫循其舊俟一二年後扣款漸少丁力稍紓再行察看情形籌議辦理仍責成該道督率備弁嚴加約束妥爲撫馭務使恪遵紀律有勇知方則桀驁自馴無難控制矣一原奏該處鎮標兵丁道標練勇額缺宜於本處土著民屯揀選精壯充補外來游民無室家妻子之可顧輕命逞兇最易滋事以後不准充補等語臣等查鎮算鎮道二標兵勇向由營屯千把總於土著親識餘丁內挑選呈送鎮道考驗充補

冊內均經登註籍貫以備查核惟道光十二年出師  
洋泉廣東勦辦猺匪案內因軍營陣傷病故遺缺係  
以隨征餘丁挑補不能盡係本籍現據委員王簡查  
明現在該鎮道兩標兵勇內外來充補無室家者兵  
丁僅止十七名練勇僅止六名因曾在軍營著有微  
勞未便遽行斥革此後自當明定章程一切外來客  
民無論有無室家概不准其充當兵勇儻員弁混行  
保送鎮道率准充補查出分別參處所有軍營挑充  
外來各兵勇仍責成該鎮道督飭備弁嚴行稽查管  
束如有滋事隨時革究以肅紀律 一原奏兵勇生

計全恃錢糧不肖官員任意尅扣餉銀則有輕秤給  
發賤則折錢價之弊口糧則有虧短斛面發價採買  
之弊又或兵勇豫行支借則有豫立領狀折扣利息  
之弊此後宜從嚴釐剔等語 臣等飭據委員王簡查  
覆該鎮標兵丁餉銀向由中軍遊擊暨各營都司守  
備按月當堂發給隊日用庫平彈兌包封呈請該鎮  
驗明會同地方文員按名監放應關本色兵米係由  
鳳凰廳按月用制斛支給道標練勇餉銀每月由屯  
守備造具名冊印領申請給發亦用庫平彈兌其口  
糧米按月發給印票自赴屯倉支領併無輕秤尅扣

賤折錢價及虧短斛面發價採買等弊又練勇於青黃不接及年節時豫借銀穀係由該道於苗疆經費內籌款墊發分月扣還亦無折扣利息之事復經該委員摘傳鎮道兵勇查訊衆口僉同取結存案是該道散給兵勇餉米尙無情弊似屬可信惟查各兵丁例支本色米石雖屬按名足發而其中有願領米者有願折錢者向來各從其便緣兵丁素無生計者全賴領米以資餬口卽以本色支放其稍有恆產者需錢使用不願領米卽照市價折發雖非定例相沿已久且係便兵之意未便遽行更易應請仍循其舊其

練勇豫借銀穀分月扣還亦爲體恤丁情量子接濟若遽停止未免丁力拮据但頻頻借貸愈積愈多究屬濫支現在該道交代銀錢轆轤不清其中卽有練勇借欠穀石一項業經臣裕泰清查此後應如何酌定限制借給之處容俟於清查案内另行籌辦一原奏道標練勇額設教習併加賞銀兩近來全以虛名報銷其加賞銀一千餘兩併不如數發給此後應照例挑充發給等語臣等卷查嘉慶十二年苗疆均屯未盡事宜案内奏明於練勇一千名內設百總十名總旗二十名小旗一百名併挑選散勇內技藝較

優者一百七十名合共三百名作為教習約束散勇於例給餉銀口糧外每名歲加銀三兩六錢按月散放如有革故辭退出缺隨時挑驗拔補現據委員王簡移道查覆此項教習該道歷係照額挑補併非虛造名冊報銷其加賞銀兩亦無尅扣情弊現有守備冊領可稽併經該委員將現設各教習按名點驗實係如數訊據各隊目僉供加賞銀兩俱係如數支領情願出具甘結等語查核尙屬實情應飭該道嗣後務照舊章挑選加賞辦理以示獎勵而嚴約束不准日久滋弊 一原奏鎮標向有存項每歲買糧千石

存儲以備兵食之不足近來該鎮因此漁利如買糧九錢一石即開銷兵丁一兩且買糧係市平扣餉係庫平於兵丁仍無便益以後仍照買糧扣算嚴禁影射盤剝等語臣等查鎮算鎮標兵丁共四千一百五十一名每年兵米自六月起至十二月止均支折色每名每日僅得米折銀六厘糴米不過二三合不敷食用經該前任總兵富志那體念兵艱籌備銀一萬兩奏明每年秋收後在鎮算城鄉採買穀石於青黃不接之時借給兵丁以資接濟仍於月餉扣還歸款道光四年前任總兵陳階平因鎮算山多田少產糧

無幾此項接濟之穀歲需萬石本地難以糴買與前任辰永道張映蛟議將前項銀兩交道就近買備屯穀一萬石散放各稱便益以後相沿辦理現據委員王簡調核案卷歷任該鎮買備前項屯穀解道銀兩均係庫平庫色其糧價或一兩或九錢七八分亦與扣收兵丁餉銀數目相符併據查明苗疆有屯各廳縣所收穀僅敷本境公用惟永綏廳收穀爲多前項營買之穀向於永綏廳撥給該廳離鎮算三百里艱於挽運所費較多是以每石需價一兩或九錢數分不等併無藉此漁利影射盤剝情弊惟查此項穀石

原爲接濟兵丁而設若因運費需資加增價值扣餉歸還仍不足以資調劑今臣等酌中定議嗣後該營買備此項屯穀價銀連運費併計總以八錢爲率倘有不敷由該道自行籌補如遇豐收賤價不及八錢卽照時價扣餉如此量爲變通於兵食稍有裨益一原奏該道每歲巡閱二次舊准詳銷賞號穀八百餘石近來該道閒歲出巡一次而每歲詳銷賞號私圖肥己併不如數給發以後應按年出巡照例實發賞號等語臣等查辰永沅靖道從前巡閱苗寨每年原止一次至嘉慶十四年因前任該道傅鼎升任本



省臬司苗民懇留經前撫臣奏奉

上諭著傅鼐每年於秋審事竣或秋成之時前赴苗疆查閱一次既可慰苗民愛戴之情亦可藉資彈壓如果接任之員經理得宜傅鼐於二三年後即停止前往欽此以後遂定爲臬司巡閱一次道員巡閱一次迨傅鼐病故後任各道員察看地方情形每年巡閱一二次不等併詳定每歲巡閱准銷賞號穀一千石歷年以來均亦支銷穀七八百石不等惟十二年該前道翟聲煥因獠匪滋事本任地方緊要未經出巡即以前項穀石賞給出師備弁丁勇人等作爲盤費等項之用於道

光十四年清查案内奏明不准開銷飭令賠還原款在案茲據委員王簡查明近年歷任各道止有十五年前革道常慶因清查屯務未經出巡然仍調齊各苗弁人等自行捐辦袍褂銀牌等項按名給賞併未動款報銷本年該護道姚華佐於四月到任適值農忙定於冬令前往巡閱此外併無未經出巡詳銷賞號之事惟查該道前因苗疆甫經戡定是以每年出巡一二次以資彈壓今苗疆承平日久地方安謐且近年奏准將永順等八府州廳屬軍流徒罪人犯改歸該道就近審轉政務殷繁若仍每年巡閱二次轉

致有名無實嗣後應請定爲每年秋收後巡閱一次不准再有藉延仍令該道將起程回署各日期詳報併令各廳縣將該道入境出境日期詳報以防日久生懈虛稟塞責 一原奏辰沅永靖道責任最重近來該省輒以熟習情形爲名於三廳同知保升安知控馭之道尤可駭者近來該道拔補苗千總苗守備等官竟須一二百金方能補放併補屯長屯丁亦須用錢打幹此後自應於本省知府內保題或於道員中調補如道府無人卽奏請

簡放所屬各廳同知併嚴加甄別不得任貪劣之員貽誤地

方等語臣等查辰沅永靖道本係請

旨簡放之缺因平苗以後設立屯防事務殷繁必須熟悉情形之員方資治理改爲

題缺由外揀補歷年遇有缺出多以熟悉苗情之同知請升惟越級升補究屬違例本年欽奉

諭旨辰沅永靖道嗣後著湖廣總督湖南巡撫於該省知府內揀員奏請升補不得輒以同知請升等因欽此本年因該前道常慶參革遺缺業經臣訥爾經額臣裕泰欽遵以岳州府知府王簡奏請升署在案嗣後該道缺出總當恪遵

諭旨於通省知府內揀員升補不得輒以同知請升以重職守而符定例其所屬各同知亦俱係苗疆要缺臣訥爾經額臣裕泰自當隨時查察如有貧劣之員卽行嚴加甄別斷不任貽誤地方至近年各該道拔補苗備弁及屯長等缺飭據委員王簡查覆均係照例秉公遴拔併無行賄打幹情弊摘傳苗弁吳廷用屯丁周盛富等三十餘員名查訊僉供無異情願具結是近年各該道驗補各缺尚無弊端應飭嗣後仍遵定例妥爲辦理奉

旨准行

十二月奏拏獲綏甯縣傳習邪教莫連等二十六名奉

硃批查緝甚屬認真嚴審定擬具奏嗣後仍當不時留意查拏斷不可留爲日後之患欽此

奏荊州等衛軍丁借造剝船銀兩難以按限扣還懇請暫行緩扣以紓丁力得

旨准行

十七年丁酉府君五十歲

正月奉

旨調補江西巡撫

二月議覆御史劉夢蘭條奏糧船丁弁容庇匪徒請未開以前責成該道搜查既開以後飭令沿途巡緝仍責成該道督同巡察究治得

旨允行

三月抵任

五月奏通飭各營練習勁弓精造火藥緣由奉

硃批武備必當加意講求弓力當強火藥當烈乃是正本之論而準頭尤爲要務認真訓練以收實用勉力行之欽此  
奏訪獲浙江販鹽菜奸民夾帶私鹽大夥鉅案嚴審究辦得

旨嘉獎

六月奏覆妥議飭拏會匪章程緣由奉

硃批立法何難總在行之以實持之以久汝其勉力整頓勿徒託諸空言也欽此

奏拏獲奸民謝勝才等夾帶私鹽嚴審究辦奉

硃批查緝甚好欽此

八月奏訪獲沿河積窩巨匪首夥楊珍珠等二十九名提省審辦奉

硃批所辦甚好一力爲之不可始勤終怠欽此

奏拏獲南贛等屬糾黨結拜搶劫拒捕匪犯七十餘

名分別審辦奉

硃批除莠所以安良必須認真隨時懲辦日久無懈方好欽

此

是月不孝長敘生側室游太夫人出

長孫志潤生不孝長啟出

九月京兆榜發不孝長啟中式第二十九名舉人

奏江西省銀價過昂請將寶昌局額卯錢文暫停鼓

鑄以便兵民得

旨允行

十月奏勘明建昌新建二縣低田被水情形請分別

緩徵以紓民力得

旨允行

又奏查明南昌德化崇仁上高等十一縣連年被水  
歉收請將應徵帶徵錢糧漕米等項分別展緩得

旨允行

奏續獲拜會搶劫匪犯一百二十三名得

旨嘉獎

十二月奏續獲拜會搶劫捉人勒贖等匪犯二百二  
十二名奉

硃批甚好欽此

十八年戊戌府君五十一歲

三月奏覆江西省軍丁疲乏各衛所屯田請俟一二年後丁力稍紓再行查看清理以示體恤奉

硃批依議欽此

四月訪聞南昌府知府張寅不洽輿情積有物議據實先行具奏查辦奉

硃批所見可嘉實力查辦斷不可稍從寬縱欽此嗣查明訪

聞各款或事出有因或訊無實據尙無不合惟城工所借道庫銀兩於紳士呈繳後不卽解還歸款率行轉借修隄又不稟明立案實屬非是其隄工所用工

料錢文爲數過多雖係糜費有因究與原估不合而小港口隄工又復久未完竣亦屬咎有應得因奏請將該府交部議處奉

旨議准後總憲姚公元之以府君查辦此案按問不實跡近挾私參奏時府君已於九月間調任湖南有

旨交新撫錢公寶琛查辦遂奏將府君及姚公一併交部察議奉

上諭各省督撫大吏於所屬各員原當隨時查察遇有應劾之員立即專摺參奏方爲無忝厥職此案裕泰於所屬知府張寅訪有物議奏請查辦本爲整飭官方起見迨經詳

查各款或事出有因或訊無實據併不敢因參奏在先稍存迴護是其前後所陳均無不合雖於同城屬員訪聞各款不先確切查明遽行入告未免跡同輕率而事屬因公併無挾私情弊裕泰著無庸交部察議等因欽此府君具摺謝

恩奉

硃批知道了嗣後尤當倍加黽勉嚴明率屬實力辦公斷不可稍存退避之見方爲不負委任依舊勉之欽此

五月奏拏獲匪犯一百四十二名分別究辦奉

硃批所辦甚好欽此

鴻臚寺卿黃公爵滋以鴉片入口紋銀出洋爲害日甚奏請嚴塞漏卮以培國本奉

旨著各督撫各抒所見妥議章程府君議上四條 一接引

外洋之奸徒應嚴定治罪專條從重擬辦也查外洋貨船夾帶鴉片自知事屬違禁原不敢公然入口若無內地奸民勾引接運則鴉片無從售銷不過正項貨物照例納稅卽有夾帶亦易稽查乃自有奸徒運銀出洋爲之接引洋人遂得肆其所欲視爲利藪近則多用躉船載煙寄泊粵省零丁等處洋面內地奸民勾通巡海弁兵用快蟹拖風等艇運銀出洋載煙

入口輾轉販運併有各項民船及渡船漁艇潛於海口接載私運其弊有不可勝言者此外他省海口亦多偷漏是鴉片之流入內地接引之奸徒實爲罪魁惡首較之開館誘食者情節尤重乃定例內只有開館者絞候興販與種植者充軍買食者枷杖加徒而於接濟外洋運煙人口之犯併無治罪專條近來有犯不過僅照紋銀出洋併收買違禁貨物等例分別問擬軍徒實屬情浮於法查律載將米穀豆麥雜糧偷運外洋接濟奸匪者擬絞立決此等不法奸徒接濟外洋將紋銀販運出洋復將鴉片私運入口病

國害民其情與運糧出洋濟匪者無異若不嚴定科條置之重典何以昭炯戒而戢奸萌應請嗣後凡拏獲運銀出洋販煙入口之犯卽照將米穀豆麥偷運外洋接濟奸匪例擬絞立決庶情法兩得其平 一沿海水師營汛各弁兵有包庇賄縱者應實究辦也

國家設立營伍原所以捍衛民生必須一兵得一兵之用當此太平無事之時惟操練巡防查緝奸匪爲營弁兵丁之本務如果實力巡防認真查緝則紋銀之出鴉片之入何至偷漏交通日甚一日其爲賄縱包庇不拏不辦情弊已屬顯然言之實堪痛恨上年廣



東省經督臣鄧廷楨等專派武職大員督令委員率同汛弁舟師隨處訪查始獲拏辦數起按擬究辦是該水師各官平日坐享規利懈縱因循已可概見應請嗣後凡有拏獲奸徒出洋接濟之案務先根究出口進口之處係何汛弁兵得規庇縱審明如有前項情弊不計贓俱與本犯同罪至死不准減等其經由營汛口岸各地方不行查拏之員弁兵役分別參革從重治罪失察之該管上司嚴行參處其有實在出力員弁能將各匪查拏報獲者除免其從前失察處分併將銀貨充賞外卽照獲盜例據實保奏請

旨破格

升用如此分別懲勸信賞必罰或不致再有疎縱仍責成水師提督就近督率各協營實力查辦以昭嚴密一海洋各項出入船隻應申明舊例實力奉行也查例載船隻出洋十船編爲一甲取具連環保結一船爲匪餘船併坐出口時必於汛口挂號船照送官驗明蓋印放行又凡商漁船隻分別書刻字樣舵工水手人等俱各給與腰牌刊明姓名年貌籍貫如船無字號人有可疑卽嚴加究治其漁船出洋不許裝載米酒進口不許裝載貨物違者嚴加治罪又沿海一應採捕及內河通海之各色小船地方官取具

澳甲鄰佑甘結一體印烙編號給票查驗如有偷越  
出口照例治罪甲鄰不行呈報一體連坐又洋船挂  
驗出口之時况弁詳細驗明各况押送如有攬載偷  
渡者卽嚴行究擬又沿海採捕出洋船隻務將本船  
作何生業於照內詳細填註俟到口岸稽查官弁將  
貨物核對若與照內不符卽時盤詰審鞫又出洋漁  
船將船主開填入照併將船甲字號大書深刻於桅  
篷船傍出口時責成守口員弁將該船前往何處作  
何生業併舵工水手年貌姓名籍貫逐一查填照後  
鈐蓋印戳倘文武員弁查填不實均交部分別議處

各等語是立法何等周密防微杜漸洵堪遵守如果  
實力奉行則奸匪從何偷漏無如地方官日久玩生  
虛應故事遂致銀煙出入流弊日滋應請申明舊例  
嚴行飭禁認真查拏倘奉行不力均交部嚴加議處  
惟海洋遼濶四通八達查拏較難誠恐此拏彼竄併  
請

敕下廣東福建浙江江蘇山東天津奉天凡沿海各省督撫

暨將軍府尹一體飭屬交相堵截協力訪緝用昭嚴  
密至此外有無應行變通成例之處臣無從查悉未  
便懸擬應由沿海各督撫再行體察情形妥議辦理

一地方文武各官不拏不辦其失察處分應從嚴定擬也查鴉片流入內地蔓延各省不但興販與吸食者爲數不可勝計卽開設煙館之處隨在亦復不少如果地方文武各官實力巡防認真堵緝何至流弊至於此極乃各該員非心存玩視卽畏難苟安不特未獲者不拏甚至已獲者不辦懈弛疎縱實屬咎有難辭雖各省大吏三令五申間有拏辦之案其失察各員又因案已獲辦亦無不隨案聲明免其處分至於鴉片之來自何處販自何年從未徹底根究其沿途失察各官職名亦向不送部議處似非核實辦

公之道查定例洋船夾帶鴉片煙進口及奸民私種罌粟煎熬煙膏開設煙館地方官失於覺察一百斤以上者罰俸一年一千斤以上者降一級留任至五千斤以上者始降一級調用是原定處分本屬從輕而獲案後又不查取職名送部核議無怪地方官罔知畏憚任其流毒貽害不拏不辦也或者謂查辦較嚴則胥役人等轉得肆其擾累爲漁利之具固矣此種情形實所不免然又豈能爲因噎廢食之見是在地方官隨時量事嚴查而變通之有犯必懲不使滋擾而已應請嗣後仍嚴飭該管地方文武各官各於

所管地面實力巡查如有能將開館及興販之犯源  
源報獲者免其從前失察處分仍卽查照案情輕重  
奏請從優鼓勵倘仍不拏不辨別經發覺卽將經過  
地方歷任失察併不行查拏之文武各官查照定例  
加等從重議處若有得規故縱情弊分別革職治罪  
該管上司一併參處如此量爲加嚴庶地方各官自  
顧考成不敢不認真查辦或可期懲一儆百漸收實  
效奏入奉

旨交軍機處會議施行

十月奏拏獲興販鴉片煙土八犯十七名起獲煙土

七千一百餘兩嚴審定擬奉

硃批無論何省必當一律嚴辦懍之欽此

是月奉

旨調補湖南巡撫月杪抵任

十一月奏甫經抵任屬員賢否未能周知請將本年  
計典展限辦理其庸劣之員仍隨時參劾以肅吏治  
得

旨允行

奏覆查明武陵縣被水農民來歲應予調劑奉

硃批候旨行欽此

十二月奏訪獲煙犯多名起獲煙土煙膏一萬餘兩  
收繳煙具一千餘件嚴行審辦奉

硃批一力嚴行查拏究治不可又形疎懈此番若不能淨絕  
根株後難措手矣勉之欽此

十九年己亥府君五十二歲

是年三月初十日先妣瓜爾佳太夫人卒於京邸享  
年四十九歲先妣仁孝恭謹逮事先大父母未嘗  
失禮待諸娣娣以和馭下有恩意自府君早歲服官  
勤理家政無煩內顧先大父母先後棄養佐府君治  
喪盡禮宗黨尤賢之歲時祭祀潔粢豐盛絕不假手

僕媪曰此吾職也家計清貧外祖家有所飲助皆以  
奉公用曰吾無私蓄也中歲隨任川湖十餘年祿入  
稍豐而家務益繁劬勞尤至氣體素弱屢因水土不  
服致病手足痿痺漸至不能動履辛卯歲府君升任

盛京刑部侍郎先妣率不孝等回京不復隨任家居節

儉勤惜物力課不孝長啟尤嚴自就外傳每夕必課

其日之所學不孝長啟應甲午乙未鄉試被擯太夫

人謂所學未至益加訓勗逮幸舉京兆甫再期而太  
夫人以虛羸之體染患痢疾百藥不效甫延十日不  
起府君聞信以糟糠之誼慟悼非常自爲文遙奠旋

命卜葬於沙溝新阡祖塋之側累封至一品夫人  
三月奏訪獲大夥煙販四十餘名起獲煙土煙膏二  
萬餘兩收繳煙具一千餘件併私硝五百餘斤五月  
奏續獲大起興販鴉片煙土人犯併究出疊次輪姦  
強姦搶竊重案分別嚴審究辦均奉

諭旨嘉獎

又奏訪獲醴陵縣內之糾眾拜會議立紅黑五門名  
色匪徒二十七名嚴審究辦奉

硃批辦理尤屬可嘉嚴訊定議具奏欽此

八月奏燬黔陽縣淫祠 先是黔陽縣黎溪磨回地

方舊有神廟供奉女神俗稱爲楊令婆彼此擲石角  
勝煽惑鄉愚經縣出示禁止府君以廟宇未毀神像  
猶存難保不日久玩生仍萌故智因飭沅州府督同  
黔陽縣親往將廟宇神像悉行撲毀附片具陳奉

硃批所辦甚好欽此

議覆御史焦友麟條陳請循照舊章舉充約正宣講  
併編保甲得

旨奉行以實

十月奏查明華容等八州縣及岳州衛被水成災請  
將各田畝蘆洲錢漕蘆課及原借口糧籽種隄工等

銀分別蠲緩併請加給華容縣及岳州衛貧民隆冬一月口糧以紓民力得

旨允行

十一月奏華容武陵二縣被水較重戶鮮蓋藏請一律借給籽種以助春耕仍俟秋後免息徵還俾貧民得資接濟得

旨允行

以查出武場賄囑換遞輕弓舞弊之武生併聽囑捏稟之營弁奏請審究

上嘉其細心

奏兩屆三年期滿懇請

陛見奉

上諭裕泰奏請陛見一摺著於道光二十一年春間來京陛見欽此

十二月奏續行訪獲傳習邪教匪犯多名提省審辦奉

硃批所辦甚好欽此

二十年庚子府君五十三歲

正月奏查明華容沅江等縣官民隄障被水衝潰民力難以全修請借項興築以資捍衛得

旨允准

五月奏訪獲湘鄉縣糾眾結拜黑會匪犯一百餘名  
嚴行究辦奉

硃批所辦好一力查緝毋許懈怠欽此

又奏訪獲攔河疊次阻詐客船匪犯多名提省審辦  
奉

硃批所辦好欽此

六月奏查明洞庭湖舵桿洲臺基條石未便拆卸請  
仍其舊以便行旅 時湖廣總督周公天爵因沔陽  
州新隄坍卸奏請改爲滾水石壩擬拆舵桿洲臺基

石條應用府君奏言竊臣前准督臣周天爵咨開沔  
陽州新隄坍卸龍王廟閘甚不得力已札飭改作滾  
水石壩查湖南巴陵縣屬柁港洲有廢廟在湖灘曠  
蕩無人之地後因藏聚盜賊拆毀剩有基址十數畝  
多長大條石該處去新隄不遠業經專摺入奏札飭  
沔陽州會同巴陵縣將該廟條石運回新隄以爲修  
築滾水石壩之用等因當經臣以該處廟宇建自何  
年何時因藏聚盜賊拆毀所存基址條石荒廢已久  
可否拆卸動用是否於湖面別有關礙行司轉飭岳  
州府確查稟覆去後茲據岳州府知府耿自檢詳據



巴陵縣知縣呂裕安詳稱該縣湖面併無柁港洲只  
有舵桿洲該洲石臺廟宇久經荒廢從前是否因藏  
聚盜賊拆毀縣署併無案據可稽惟查省府縣各志  
內載舵桿洲沙積彎長向爲行旅泊舟之所於雍正  
九年奉

旨發部存平餘銀二十萬兩修築石臺周圍二百五十七丈  
二尺袤九十六丈高六丈址高三十丈頂二十丈上  
建神廟該洲北如弓背式浪至易分南爲偃月隄灣  
深可泊凡往來舟楫遇水漲風驟棲泊臺南永無漂  
淪之患共用銀十六萬七千餘兩餘作歲修之用岳

州水師營及洞庭營各設防兵五名乾隆九年總督  
阿爾賽等奏明石臺不便泊舟請停歲修餘銀撥作  
他用等語又恭錄雍正九年正月二十一日欽奉

上諭朕聞洞庭綿亘八百餘里自岳州出湖以君山爲標準  
一望渺然橫無涯際而舵桿洲居西湖之中去湖之四岸  
或百餘里或二百餘里舟行至此倘遇風濤陡作無地停  
泊亦無從拯救多有傾覆之患昔人曾經劄議若於此處  
建築石臺則狂風巨浪之中商船有灣泊之所實有裨益  
祇以水中立臺工用浩繁事不果行朕以勤求民瘼爲心  
凡內外遠近地方疏濬修建工程可以利濟羣生者無不

樂爲興舉况商賈行旅之往來可以避風浪之險而登衽  
席之安尤事所當舉者查營田水利捐納項內有平餘銀  
二十萬兩著將此項銀兩解送楚省交與總督邁在會同  
巡撫趙宏恩遴選賢能之員相度估計悉心經理建築石  
臺以爲舟楫避風停泊之所務須修築堅固以垂永久毋  
得草率塞責特諭等因欽此該縣隨即親詣查勘舵桿洲  
在洞庭湖之中距府城一百餘里該處有石臺一座  
四面被水衝擊坍塌東西存三十五丈二尺南北存  
一十六丈六尺水離臺頂六尺距湖四岸約百餘里  
及二百餘里不等臺上廟宇久廢土中間露石砌廟

基左右各長二丈有餘高二三尺不等併有石柱三  
十五根此外大小條石寬窄不一俱係亭廟坍塌存之  
物臺之東南有土埂一道岳州水師營及洞庭營設  
有巡船派兵乘坐在彼灣泊巡緝岳州府通判設有  
救生船一隻亦泊該處詢據該處耆民漁戶人等僉  
稱每遇夏秋湖水漲發幸有臺基土埂行舟藉以收  
口灣泊如將臺石拆卸巨浪無所抵禦洲地土埂勢  
必隨浪坍塌舟行遇風無從趨避卽洞庭等營巡船  
及救生船隻俱無處灣泊實多未便等情由藩司王  
藻覆加查核詳請免其拆卸前來臣查洞庭一湖界

連四郡北通巫峽南極瀟湘廣袤數百餘里總匯上游沅湘蒸資諸水以爲巨浸如遇下游江水漲發由荊州南從華容匯漾入湖瀉浪排空一望無際該洲砥峙中流環列君山扁山團山明山數峯爲之犄角上游諸水至此分流江水倒漾賴茲抵禦各得殺其奔騰之勢是該洲不但於全湖形勝有關抑且爲通省水利所係前蒙

世宗憲皇帝軫念民瘼

特賜帑金於此建立石臺永鎮南服

聖謨深遠乃後之地方大吏不知遵守保護輒以不便泊舟

停止歲修已屬非計猶賴存有石基俾此洲土因戴石而堅石以附土而固交資爲用已經百有餘年舟行至此驟遇暴風恃有該洲可以收纜趨避往來行旅至今感頌

皇仁若

一旦將臺基拆毀無石捍衛則洲土鬆浮勢必隨浪坍塌是全湖之形勢變遷舟楫之停泊無所卽洞庭等營巡船及救生船隻亦俱無處依棲實於湖面行旅大有關係至該洲廟宇臣檢查舊案詳考志書實因從前惜費停修遂至荒廢併非因藏聚盜賊而毀有案可稽且該處臺基在荒洲空曠之地併有兩營

巡船駐彼查緝匪類無可容身斷不致棄爲盜賊之  
藪臣體察情形諮訪輿論該洲臺基石條實未便妄  
行拆卸致滋他虞應請仍循其舊以重湖面而便舟  
行除咨明督臣周天爵將沔陽州應用建壩石料另  
行採辦修築外所有查明巴陵縣舵桿洲臺基石條石  
未便拆卸緣由理合恭摺具奏伏乞

皇上聖鑒訓示謹奏奉

硃批依議欽此

八月奏倡捐經費資送湖北江蘇二省流民四千八  
百餘名回籍併移會上游各省一律辦理奉

硃批所辦好妥爲之欽此

奏續獲糾眾拜會併強劫輪姦強姦殺人等項大夥  
匪犯二百餘名嚴審究辦奉

硃批所辦好欽此

十月奏查明安鄉巴陵等七州縣均被水災請將各  
田畝蘆洲錢漕蘆課及原借口糧籽種隄工等項銀  
米分別蠲緩以紓民力得

旨允准

十一月奏查閱省營官兵技藝情形併將庸劣不職  
員弁核實甄別以肅營伍

奏查明武陵縣被水農民請借給來春籽種以資調劑奉

硃批候旨行欽此

又奏湖北長樂縣匪徒胡啟全等糾眾滋事派員防堵

十二月奉

旨升任湖廣總督具摺謝

恩併遵前

旨請於抵任後將地方應辦事宜趕緊料理入都

陛見次年正月奉到

硃批俟本年冬間再行奏請陛見可也欽此歲杪抵任時外洋犯順署湖南提督鎮筵鎮總兵祥公福帶兵赴粵府君以南省界連粵東當此海氛不靖之際若無大員防範誠恐匪徒煙販藉端勾結分竄滋事查湖南提督楊公芳入都

陛見甫經交卸起程約計尙未出境因奏請

飭令楊芳暫回本任一面飛咨楊芳迅速拆回以專職守奉硃批所見甚是卽著楊芳速回本任欽此

二十一年辛丑府君五十四歲

正月兼署撫篆

是月長孫女生不孝長啟出

奏加培荊州府萬城大隄土石工程以資捍衛萬城大隄爲荊州及下游各屬保障素稱堅實二十年江水盛漲坍塌甚多必於春汛前一律修培完固方資保衛因奏請動支司庫籌備生息銀二萬九千餘兩以便趕緊購料興工奏入報可

奏湖南官兵現在奉調遠征所有接閱營伍及二年半薦舉請展限舉行奉

硃批依議欽此

二月奏奉調赴浙會勦官兵不宜遽行截回時接

兩江節相伊公里布咨會因暎人繳還定海沙角仍准通商應將前調之皖楚等省官兵截回府君因奏言兵心一懈再鼓爲難即使彼族真心納土輸款亦當斟酌緩急分別次第撤回方爲有備無患臣前奉諭旨詳慎選派諳練宿將管帶精兵分起啟程併各曉以大義其奮勇圖効之誠咸勃然見之顏色現在臣雖接准來咨誠恐致懈兵心不敢孟浪轉行是以仍令前進統俟奉到

諭旨再行欽遵辦理奉

硃批所見是邇來明發諭旨陸續接閱後自了然矣欽此

奏查明楚省州縣有缺之員悉令各回本任緣由  
時楚省州縣每多署任府君抵任後逐一清釐有以  
實任而調署他縣者有以補缺而不令赴任者有部  
選到省暫留學習而又委署他缺者從無定章殊乖  
政體因行司清釐除現有留緝命盜重案及經手緊  
要隄工准其暫留署任外其餘有缺之員悉令各回  
本任以重職守而杜取巧奏入奉

硃批所辦甚是欽此

飭湖南等屬實行保甲團練鄉勇以禦奸宄 時海  
氛未靖府君以湖南界連粵東恐匪徒煙販乘機勾

結滋事因飭永州桂陽郴州等處仿十家牌法認真  
編查併剴切曉諭士民不限人數各自團練以資邊  
境之助

又以兵米被水蠲緩荆倉不敷支放請動項買補又  
請籌款購鐵運浙接濟軍需俱奉

旨允行

四月奏督辦緝私情形 湖廣歲額銷鹽七十七萬  
九千九百二十餘引爲淮綱最重口岸全在鄰私屏  
迹官引始能暢行而地當孔道私販路路可通雖節  
經在於各要隘分設卡座派委文武員弁駐守查緝

周歷遊巡布置不爲不密然過嚴則恐開滋擾之端稍寬又遂啟因循之漸府君抵任後留心稽核漢岸銷數未能較前暢旺雖因春雨連綿所致亦難保非緝私各員意存懈怠因嚴飭實力偵緝計自正月起至閏三月止北南兩省共獲私鹽一百四十七起人犯四百餘名計鹽四萬三千六百餘觔併訪聞武昌黃岡二縣向有刁民充作帶頭勾通上水鹽船銷售脚私密委幹員馳往會同各縣拏獲著名帶頭黃利貞等十二名解省密辦併飭復武穴舊卡遴員駐查以昭嚴密復查得運鹽船戶每於盜賣引鹽後或放

船遠遁或自行鑿沈以遭風淹消捏報商人則圖免課補運併不追求地方官復以所短鹽斤計贓無不逾貫遂一意姑息聽其狡供苟且了結遂嚴行通飭嗣後遇有呈報淹消之案務須勘明核實究辦不得稍從寬縱俾知警懼以挽頽風此外水陸各路私鹽亦嚴飭該管文武及卡巡各員認真巡緝上緊堵拏其原定章程有未便者卽行量爲變通期於

國課民生兩有裨益奏入奉

硃批隨時認真辦理欽此

七月收養流民 楚省素稱澤國二十年旣被水較



重本年復春雨過多江湖併漲兼之下游各省水勢  
旺壯頂阻難消以致濱江臨漢各屬田廬多被淹沒  
居民紛紛外出覓食府君飭屬禁止一面招徠截留  
率同僚屬籌辦撫恤妥爲安頓併勸諭士商捐輸協  
濟就漢口鎮設廠收養自秋徂冬計全活者十萬餘  
人併奏請將被水各州縣照例撫賑併分別蠲緩錢  
漕以蘇民困得

旨允准

八月遵

旨保舉道府以下潔已愛民誠心任事人員以儲

簡用

九月以御史盧毓嵩奏請嚴禁私硝遵

旨議奏收買民間撮積硝斤及查禁私販偷漏章程得

旨認真嚴辦

十一月奏修潛江縣隄潰口以工代賑又奏鍾祥縣  
羅家腦隄工漫口擬添築月隄一道以資捍衛均奉

旨允准

又請將荊州之周正關移於柳家集以防偷漏下部  
議行

十二月奏請將歲修江陵縣虎渡汛各隄公安縣江

支各隄不敷銀共五萬餘兩在於司庫正項內借動  
興築以禦汎漲得

旨允准

奏請

陛見奉

上諭著於道光二十二年年底再行奏請欽此

崇陽縣逆匪鍾人杰滋事親往剿辦 鍾人杰係崇  
陽縣生員因案斥革擬徒逃回嗣把持錢漕與胥吏  
有隙遂聚眾倡亂於十二月十二日戕官據城府君  
聞變卽帶兵馳赴咸甯併飭湖北臬司郭公熊飛帶

兵馳赴蒲圻以扼其衝時楚省官兵先因海氛不靖  
多已調赴浙粵餘兵甚少府君行營僅帶省標兵三  
百名招募鄉勇及徵調上游官兵一時均未齊集鍾  
逆復乘閒襲據通城併遣逆黨分撲通山蒲圻劫奪  
驛馬焚掠居民建立忠勤王偽號併授逆黨知縣千  
總等偽職府君以賊眾本係烏合乃敢乘官兵未集  
妄肆蛙張又通山蒲圻爲其出入門戶屢次攻撲城  
垣意在必得設通山不固則興國難支蒲圻偶疎則  
嘉魚可慮咸甯三面受敵守備單薄堵剿綦難須先  
示以軍威折其逆焰方可尅期進剿隨飭隨行將吏

密授機宜分往策應併飭副將雙福帶兵赴援三十日五鼓賊果由山嶺分路潛進攻撲蒲圻之丁泗橋官兵奮勇截殺副將雙福亦帶兵馳至合力痛剿斬獲甚多賊衆披靡奔竄其分撲通山賊匪亦同時爲叅將清保等所敗兇鋒頓挫

二十二年壬寅府君五十五歲

正月奏停止徵調陝甘官兵 先是因楚省兵力太單奉

旨調陝

甘兵二千名來楚協剿府君因續調之南北官兵將次齊集而提督劉公允孝亦奏明帶兵指日可到統

計前後所調已有五千餘名足敷分派且再獲勝仗賊胆已寒不難尅期殄滅陝甘距楚較遠奏令無庸前來時荊州將軍祿公普請帶滿兵協剿府君以荊州爲上游重鎮且與南省毘連不可無大員控制亦奏止之初三日副將雙福復大敗賊衆於丁泗橋斬獲甚多初十日賊匪萬餘人復撲通山盤踞山巔飛石雨下兇焰甚熾把總魏鴻興先登陷陣叅將清保等率兵繼之奮力衝擊槍礮併施奪據要害賊衆大潰狂奔斬獲無算蒲圻縣城亦於初九日黎明賊衆蜂擁齊至占據城外東南山坡經臬司郭公熊飛及

叅將劉定選守備玉貴等督兵開放槍礮殺賊多名  
猶復恃衆四面圍攻時進時退勢甚猖獗在城文武  
併力守禦頗形危急適先期派往策應之副將雙福  
等帶領兵勇八百餘名馳至卽由北路兜剿殺賊二  
千餘人生擒多名城內兵勇開門夾擊賊衆大敗十  
一日南路賊匪復來撲城又擊敗之奏入奉

上諭本日裕泰由驛馳奏官兵剿擊賊匪大獲勝仗一摺覽  
奏甚爲欣悅逆匪恃衆撲城該兩邑派防文武員弁合力  
堵擊用少擊衆連次大獲勝仗挫其兇鋒可嘉之至裕泰  
剿辦逆匪現在崇陽通城兩縣雖未卽時克復惟督派將

弁連獲勝仗尙屬調度有方著加恩賞戴花翎等因欽此  
在事出力員弁均蒙

恩升賞有差十五日雙福等復揮兵奮擊賊衆奔潰時提督  
劉公允孝已由穀城帶兵馳至卽於十八日拔營進  
攻府君親隨教習楊城管領義勇亦於十九日隨同  
遊擊謝正國知縣夏廷樾等前進奪獲高險賊卡數  
處賊衆奔竄府君卽移營丁泗橋督剿知府周鳴鸞  
叅將清保等全日由通山進奪泉口界頭等卡卽日  
會合進圍崇陽以圖收復奏入奉

上諭裕泰等奏官兵連奪賊卡分道進剿一摺所辦甚好裕

泰調度有方著加恩先行交部議敘等因欽此府君以逆匪聚眾滋事除黨逆各匪外大半愚氓無知怵於殘害不敢潛逃初非甘心從逆現在大兵進剿但期罪人斯得昭示

天威若概予駢誅亦殊可憫因預禁將士勿得妄殺邀功一面多張安民告示併密令前署咸甯縣知縣夏廷樾前署崇陽縣知縣金雲門諭令咸甯紳士潛結崇陽士民將首要各犯設法羈縻一俟官兵到齊卽行相機擒縛二十日劉提軍白石盤山率兵進剿遊擊謝正國亦同日敗賊於黑橋進攻白蟻橋賊巢鍾逆聞

官兵五路併進逼近舊居巢穴驚惶無措方與逆黨聚謀欲圖竄逸崇陽紳士等乘機給令出城各路兵勇齊至遂將鍾人杰陳寶銘汪敦族立時一併生擒府君卽由洪上一帶前進收復縣城復分兵前往通城接應收復一面將未到官兵飛速截回併將該首逆等訊明遵

旨檻送京師奏入奉

上諭本日據裕泰等由六百里馳奏收復崇陽縣城生擒首要各犯一摺覽奏欣慰之至逆匪於上年十二月十二日據城戕官建立偽號經該督等調兵防剿謀勇兼施在事

文武官員弁兵紳民均同心協力迅掃欃槍甫及四旬收復崇陽縣城生擒首要各犯辦理迅速甚屬可嘉裕泰前已賞戴花翎著加恩賞加太子太保銜併賞換雙眼花翎劉允孝亦著加恩賞換雙眼花翎發去花翎二枝交裕泰劉允孝祇領在事文武各員弁併嚮導內應羈縻誘令之紳士民人及出力各義勇均著據實保奏候朕施恩據奏該督行營經過地方紳民薰香跪道帶兵各員均能不忘殺戮現在地方敕謐朕心甚慰所有留撤官兵及善後事宜均著裕泰妥籌具奏賊匪鍾人杰陳寶銘汪敦族著卽選委妥員檻送京師盡法處治以伸國憲而快人心將此

通諭中外知之欽此二月全獲逆黨一百二十五人審明後擇其情節較重者恭請

王命就地正法餘分別問擬有差奏入奉

上諭裕泰奏逆犯全數擒獲併拏獲首要家屬分別辦理一摺除鍾人杰陳寶銘汪敦族三犯仍遵前旨派員解京外其僧白青鍾十四二犯著於訊明後卽在該處正法逆屬十四名口從犯一百二十五名及各逆田產著該督分別照例辦理提督劉允孝著卽回任以重職守其所帶官兵亦著凱撤歸伍所有善後一切事宜著裕泰妥爲籌辦併將遷避居民出示招回俾各安本業無令失所此次裕泰

辦理軍務迅速蔽功且於收復兩城之後卽將首要各犯併逆匪家屬全行生獲不留餘孽甚屬可嘉著再加恩交部議敘餘著照所議辦理欽此遂奏改崇陽縣爲繁疲難三字題缺由本省揀員題補添設巡檢一員民壯五十名千總一員兵丁十六名通城縣汎改設把總一員添兵七名其原設通城汎外委改爲崇陽縣洪上貼防外委添兵七名以資防守嚴禁包攬錢漕勒索積弊併添設義學三所延請品學兼優塾師掌教復飭該學教官於朔望輪赴鄉村宣講

聖諭廣訓俾積漸薰染以默消其獷悍之氣奏入均 報可





